



Minggu, 01 September 2024

Ogen: Kejadian 25:19-21



"Itotoken Perbulangenna"



Ishak ras Ribka e me salah sada jabu si penting i bas Padan Si Ndekah. Perjabunna labo erdandanken pertemanen tapi perjodohen sinilakoken i teruh rencana Dibata. Anem bage gia, labo ka kepeken pulah perjabunna arah perbeben.

Ishak erjabu man Ribka tupung umurna 40 tahun, tapi anakna Jakup ras Esau tubuh kenca umurna 60 tahun. Ertina lit 20 tahun ia ertima ras Ribka kerna anak nipupus. Ertima, erusaha, gagal, bage me si idalanina kidekah ia nimai padan Tuhan man bapana Abraham mereken kesusuren si desken kersik buena, tempa-tempa nimai buah parimbang. Semangat, putus asa, keke ka ngulih, bage-bage me si arus ialakenna guna ndalani wari-warina. Ribka selaku sekalak diberu nge rusur jadi soroten di kune ndekah jabuna langa mupus. Tekanen batin erkiteken iakap la serta selaku diberu, bage pe erkiteken ketedehen atena gelah ngangkip anak, nama ngaruh pe ku bas situasi emosina, banci jadi ngaruh pe ku kesehatenna. Penungkunen-penungkunen si ibelasken kalak kerna jabuna pe banci jadi nggo iakapna jadi penokohen. I bas si e, patut si ergaken peran Ishak selaku perbulangen i bas situasi ndeharana.

Ishak maba perbeben e jadi perbebenna ras alu mengutamakan kondisi Ribka. Kekelengen jadi tambar ras mpeturah biak si mehuli. E maka itotoken Ishak si Ribka. Pertoton si labo sifatna spontan, sekali e ngenca, tapi sada pertoton sapaat, si erbahanca Ribka ras ia jine ngasup, megenggeng ras saber nimai paksa Tuhan ipetangkas i bas jabuna 20 tahun dekahna. Sangap Ribka, itotoken perbulangenna ia. Inti perjabun e eme persekutuan si intim, sada nge kita aminna 2 pribadinta si pelain-lain. Persekutuan e irakut i bas kiniteken man Tuhan, idalani alu kekelengen ras ipeteguhi alu pengarapen, maka perbeben e banci si bentasi. Pindolah toto man perbulangenta, sabap ia nge pengulunta isuruh Dibata bas jabu e.

Patuhlah man perbulangen sabap ia kap pengulu ndehara